

Fasnachtswäägwyser 2017

Marschiebige

Jungi Garde

D Marschiebige sinn am 8., 15. und 22. Hornig 2017 in dr Lange Erle. Abmarsch isch jewwyls am 18.30h bi dr Drammstation Niederholz in Rieche. Die Jungi Garde lauft denn zur Drammschlaufe Eglisee und wider zrugg zem Niederholz. D Eltere hoole ihri Kinder jewwyls pünggdlig am 19:30h bi dr Drammstation Niederholz in Rieche ab.

Rhyserva

Die separati Marschiebig findet äntwäder am 15. oder 22. Hornig 2017 anstatt – dyysbezyglic wird no orientiert. Abmarsch isch am 19h bi dr Drammschlaufe Eglisee.

Die gmainsami Marschiebig mit em Stamm isch am 1. Merz 2017 (d Infos gsehsch unde).

Am 25. Hornig 2017 isch d Rhyserva wie allewyyl an dr Witterswiler Fasnacht.

Stamm

Die separati Marschiebig isch am Sunndig, 19. Hornig 2017, vorem Drummeliuffdritt im Haafenareal z Basel. Abmarsch isch pünggdlig am 13h bim Restaurant Schiff an dr Hochbärgerstrooss 134 z Kleinhüünige. Wär vor dr Marschiebig no eine will nää, ka das gärn mache - s Restaurant Schiff het am Sunndig vom 10h bis 24h durchgehend offe. Die gmainsami Marschiebig mit dr Rhyserva isch am 1. Merz 2017 (d Infos gsehsch unde).

Gmainsami Marschiebig – 1. Merz 2017 (daas Joor ohni Jungi)

Dr Stamm und d Rhyserva dräffe sich an dr Drammschlaufe Eglisee und laufe denn gmainsam am 19:30h ab in Richtig Niederholz. In dr Pause sinn mir wie die letschde Joore im Melsa bim Niederholz. D Rhyserva blybt dort denn no bitz länger hogge, während dr Stamm nomoll zrugg ans Eglisee lauft.

Kopfladärnli

Wär vo de Junge und vom Stamm no kei Kopfladärnli het, söll sich umgehend bim Matthias Schwab (Handynummere 079 568 02 28) mälde. Är wird euch denn eins barat mache. Bi dr Goschdymussgoob wird euch denn s Ladärnli gege e Depot vo CHF 50.-- übergäh.

Falls öbber vo dr Rhyserva none Kopfladärnli bruucht oder dyysbezyyglic an Aalygge het, söll sich doch bitte diräggt mit em Rico Braun (Handynummere 079 337 96 73) in Verbindig setze.

Achtung: Unseri LED-Lämbbli bruuche handligi 9V-Batterie! Und wenns Ladärnli kurz vor de Viere nimmi sötti funggtioniere, bietet sich dr Matthias Schwab eimoll mehr als Notfall-Lämbblidoggtter aa. Viele Dangg drfür!

Dambuure äxtra

Weli Drummle sölli mitnäh?

Nadürlich hoffe mir uff Holzdrummle-Wätter! Ass mir am Cortège und au Zobe e guets Bild abgänn und vor allem s Drummle perfäggt döönt, hänn mir für d Fasnacht die folgende Reegle:

- Am Morgestraich kasch sälber wähle, ob du mit Medall oder Holz duesch laufe.
- Nached Morgestraich mache mir bim Zmorge ab, weli Drummle mir alli am Nomidaag bim Cortège und Zoobe derby hänn. Dr Dambuurechef wird schlussändig d Entscheidig allne mündlig mitdaile.
- Für am Mittwoch gilt, dass weme nüt anders hört, mir d Holzdrummle drby hänn. Falls es doch Blääch sötti wärde, wird dr Dambuurechef per SMS kurzfristig alli orientiere. Lueget also bevor dr usem Huus gönd, nomoll kurz s Handy aa.
- Bi Frooge erreicht ihr dr Dambuurechef, Beni Balmer, ufem Handy unter 079 359 44 85.

Wenn dr s Drummelfäll rysst...

Wenn dr s Fäll sotti rysse oder dr Drummle anderwytig usenanderbricht, bietet dr Schleichbach au an dr Fasnacht 2017 e Notfalldienscht aa. D Öffnigszyte sinn am Mändig vo 8h bis 20h, am Zyschdig vo 9h bis 22h und am Mittwoch vo 10h bis 19h.

Bim ne Ryss im Fäll während dr Fasnacht und em Bummel kasch es folgend diräggt em Dambuurechef mälde. Wenn de den dr Beleg em Kassier duesch schigge, krieggsch vo dr Clique 2/3 vo de Unköschde zrugerstattet.

Ladärne-Apéro und Lambbe-Yypfyffe vom Sunntig, 5. Merz 2017

Alli Rhyschnoogge, wo am Nomidaag scho alles barat hänn, könne ab de 15:30h im Kornhüüsli an dr Kornhuusgass 10 scho moll ein go schnappe. D Rhyserva het für alli Rhyschnoogge, wo Luscht hänn, bereits jetzt e baar Tisch reserviert.

Wie allewyyl dräffe sich denn alli Rhyschnoogge ab de 17:15h bim Hauptyygang zer Universidääd am Petersplatz zem Ladärne–Apéro. Bsunders willkomme sinn dort au

unseri Passive sowie alli Verwandte, Fründe und Bekannte. Dr Apéro wird daas Joor vom Stamm organisiert – beschde Dangg drfür. Bim ne feine Gleesli Wyss oder em ne kiehle Bierli kame denn unseri 3 Lambbe bestuune.

Spöteschtens am 18h stöhn alli Pfyffer yy zem Ständeli für unseri beide Lambbemooler: Niggi Friedli (Jungi Garde) und Thomas Thüring (Stamm und Rhyserva).

D Rhyschnoogge laufe denn zem Spaledoor, via Spalevorstadt an dr Lyss verby, yybere Spalebuggel aabe zem Schnabel.

Am 19:15h gohts wyter über die Mittleri Brugg diräggt vor unser Stammlokal em Rübhuus. Fürs Nachtässe sinn im Rübhuus Disch für unseri Clique reserviert. Es isch en Ehresach derte z ässe, wo mir s ganzi Joor derfe gratis iiebe! Und denn gohts wirgglig nimmi lang und d Vorfreyd wird fascht unerdrägglig – bis es z Basel vieri schloot!

Wenn und wo kasch d Rhyschnoogge an dr Fasnacht am beschte gseh?

Do sinn 3 Tipps für alli Passive, Pausierende und unseri Fründe:

- Stand am Morgestraich am vieri in d Utegass und loss d Rhyschnoogge an dir verby laufe.
- Drugg dr unser Fasnachtsbläänli uss und driff uns am ne Halt während em Cortège.
- Oder de kunnsch Zoobe an e Halt, nimmsch ein mit uns und laufsch denn de Dambuure hindedryy.
- Kumm am Donnschdig am Morge an Ändstraich (am vieri) vore Schnabel und sag mit uns dr Fasnacht 2017 gmainsam: „Adie und bis bald...!“

s Wort vom Stamm-Zugchef

„Ystoh - vorwärts - Marsch“

Bald isch es wieder sowit und es isch Fasnachtszyt. Drum möcht ich euch, ohni gross z'lamentiere, wie allewyl über e paar Regle informiere.

Ø **Stand pünggtlig yh.**

Ø **Lueg und los uff e Dambuurmajor.**

Ø **Dr Dambuurmajor sait a und mir laufe los, au wenn nonnig alli sotto do si.**

Y freu mi uf e tolli Fasnacht mit Euch, Cyrill

Dr Morgestraich, 6. Merz 2017 – pünggtlig am vieri!!!

Am 3:15h erwartet d Vordrabchefin ihri Vordräbler zem Stäggeladärne fasse im Atelier.

Dr Räscht vo dr Glygge stoot am 3:45h hinder dr Lambbe vom Stamm in dr Utegass, Hööchi Lindebärg, yy. Dr Dambuurmajor wird wie allewyyl dangg sinere Fungguhr eimoll mehr pünggtlig am vieri: „Morgestraich, vorwärts, marsch“ riefe. Dr Morgestraich drumme und pfyffe mr au daas Joor 2 Moll – zerscht im Stooch und laufe denn bim 2. Moll ab.

Mir laufe am Morgestraich...

...durch d Utegass, denn über die Mittleri Brugg bis zem Storche, unserem erschde Halt. Zämme mit de Junge und dr Rhyserva göhn mr denn wyter an Seibi. Vo do uss haues die Junge in d Kunschthalle go Zmorge ässe. Am 6:30h hoole d Eltere die Junge in dr Kunschthalle pünggdlig wider ab.

Dr Stamm und d Rhyserva gniesse denn die bsunderi Ambience none bitz und laufe zämme an Rümmeplatz. D Rhyserva goht denn uff die 7h in d Haseburg und dr Stamm am 7:30h ins Kaffi Huguenin go Zmorge ässe.

Nachem Zmorge gits denn no e glatts Zyygli vom Stamm und dr Rhyserva, bis sich denn die Letschde schlussändlich no in d Rio Bar verirre!

Am Mittwuchs-Cortège isch z beachte...

Es isch en Ehresach, dass mir uns bi de Rhyschnoogge geegesytig dien interstütze - dorum wärde wider 4 Dambuure vom Stamm d Rhyserva bim groosse Riehme vom Luftgässli (Rest. Rubino) bis zem Lälle Keenig musikalisch unterstütze. Au do bi de Dambuure, wie s letschdi Joor, eifach d Lugge schliesse – es isch jo denn eimoll mehr genau 1 Reihe, wo fählt. Vyyle Dangg!

Dr Zischdig, 7. Merz 2017

S traditionelle Jungi Garde- und Noomidaagszyygli

Am Fasnachtszyschtig sinn vor allem unseri Junge Vordräähler, Pfyffer und Dambuure drby. Und es gilt wie jedes Joor „Charivari“ (d.h. e Jede zieht das Goschdym aa, wo är oder sie Luscht druff het).

Yglaade sinn au alli Eltere, Frinde, Noochbere und Bikannti im Goschdym - mit oder ohni Instrumänt. Mir hoffe am Nomidaag au uff e grossi Unterstytzig vom Stamm und dr Rhyserva; dorum sinn alli Rhyschnoogge ganz härzlig yglaade, drby z syy.

Achtung: Fyr das Zyschtigszyygli gits kai offizielli Zugsbegleitig. S Zyygli wird jedoch dur dr Dambuurmajor vom Stamm nach Blaas bis zem Schluss durch dr Noomidaag gfiert.

Ystoo ka me ganz eifach an folgende Zyte und Ort:

am 14:00h	simer uff em Andreasplatz
am 15:00h	bym Bruune Mutz am Seibi

am 15:30h	gits e Ständeli an dr „Fasnacht zem aalänge“ (Spalevorstadt 11 im FÜRwehrdepot) mit aasschiessendem Apéro für Jung und Alt
am 16:15h	laufe mir vo dr Spalevorstadt 11 gsterggt wider ab
am 17:00h	simer vor em Gifthyttli
am 17:30h	Schluss vom Noomidaag vor em Schnabel

Sälbschtverständlig dörf me jederzyt zem Zyygli drzuestoosse. Wies und wennis am Oobe wytergoot, wird kurzfrischdig bekannt gäh.

Traditionelli Dräffpünggt vo de Rhyschnoogge am Zischdig:

- 14h bim Andreasplatz
- Ab em 22:30h dräffe sich alli Zyschdigszyygli vorem Gifthyttli. Dr Abmarsch vom groosse Zuug isch denn am 23h diräggt vorem Gyfthyttli.

Dr Morgegruess (Daagwach) – d Stimmig no e ledschts Moll gniesse...

An dr Fasnacht und em Bummel dörfe mir jewyyls 1 x unsere Morgegruess zelebriere: am Fasnachtsändstraich (inkl. Lambbe) und am Ändi vom Bummel. Denn gilt jewyyls nomoll vollschdi Konzentration für e wunderscheene, musikalische Abschluss.

Am beschde luegsch dr Morgegruess grad nomoll aa, damit de die letschde Momänt vo dr Fasnacht und em Bummel ussgybig kasch gniesse...

Donnschdig, 9. Merz 2017 – e druurige Daag, aber nach dr Fasnacht isch jo bekanntlig vor dr Fasnacht!

Zem Abbaue vo de Lambbe und de Requisit drifft me sich am 16h im Hof vom Schuelhuus „Mugge“ am Schlüsselbärg bim Münschderplatz. Nach „getaner Arbeit“ göön die, wo Luscht hänn, no e feins z Nacht go ässe und klinge dr Oobe gmainsam uss.